

Aheng û Mûsîqî di Helbestên Melayê Cizîrî De

Abdurrahman ADAKⁱ

Kurte: Aheng, di edebiyatê de hêmaneke bingehîn a şêwaz û estetîka edebî ye. Aheng li ser du beşan dikare bê dabeşkirin: Ahenga rîtmîk (kêş) û ahenga dangan (serwa, paşserwa hwd). Di nav hemû cureyên edebî de herî zêde helbest xwedî aheng e. Ahenga helbestê di heman demê de mûsîqîya helbestê ye jî. Di tarîxa edebiyata Kurdî de aheng û mûsîqî di helbestên Melayê Cizîrî de gihîştîye lutkeyê. Mela di tarîxa edebiyata Kurdî de yekem kes e ku kêşa erûzê bi hemû regezên xwe û bi awayekî serkeftî bi kar aniye. Mela di di Kurmanciya sade ya rojane de jî erûz bêqusûr tetbîq kiriye. Serwaya hundurîn yek ji taybetiyên xweser ên şêwaza Melayê Cizîrî ye. Mela di 31 helbestên xwe de bi şeş şêweyan serwaya hundurîn bi kar aniye û wek şêwazeke taybet behra recezê ji bo serwaya hundurîn terxan kiriye. Mela di helbestên xwe de hunerên bedî'î yên bi ahenga dangan re têkildar jî bi kar anîne ku ew jî hunerên wek î'ade, 'eks, tekrîr û alîterasyonê ne. Di encamê de Mela di helbestên xwe de aheng û mûsîqîyeke bihêz bi dest xistiye, hin şêwazên taybet şopandine û di vî warî de bûye pêşeng.

Peyvên Sereke: Melayê Cizîrî, aheng, mûsîqîya helbestê, kêşa erûzê, dubarekirina dangan.



Harmony and Music in Poetry of Molla al-Jazari

Abstract: Harmony is a main element of literary form and aesthetics. It can be classified into two sections: rhythmic harmony (metric) and sound harmony (rhyme, rime etc.). Poetry has more harmony than all other literary genres. Poetic harmony is also poetic music. In the history of Kurdish Literature harmony and music reaches to a paramount level in Molla al-Jezari's poetry. In the history of Kurdish Literature, Molla was the first poet who used prosody meter successfully in a broader perspective. Molla used prosody in daily Kurdish as well. Internal rhyme is one of independent characteristics of Molla al-Jezari's form. Molla used internal rhyme with six different forms in his 31 poems and as a special form he reserved recez prosody for internal

ⁱ Doç. Dr., Zanîngeha Mardin Artukluyê, Beşa Ziman û Edebiyata Kurdî, abdurrahmanadak@gmail.com.

rhyme. Molla also used literary arts of sound harmony such as return, inverse and alliteration. To sum up, Molla gained a powerful harmony and music in his poetry, he followed some special forms and became the pioneer of that field.

Key Words: Molla al-Jazari, harmony, poetic music, prosody meter, sound repetition.



Melayê Cizîrî'nin Şiirlerinde Ahenk ve Musiki

Öz: Ahenk, edebiyatta üslup ve estetiğin temel bir ögesidir. Edebiyatta ahenk unsurları iki kısım halinde ele alınabilir: Ritmik ahenk (vezin) ve ses ahengi (kafiye, redif vd.). Edebî türler içerisinde ahenk açısından en üst düzeyde olanı şiidir. Şiirin ahengi aynı zamanda şiirin musikisidir. Kürt edebiyatı tarihinde ahenk unsurları, bir bütün olarak ilk kez Melayê Cizîrî'nin şiirlerinde ortaya çıkmış ve zirveye ulaşmıştır. Kürt şiirinde aruz veznini geniş bir perspektifle ve başarılı bir şekilde ilk kez Melayê Cizîrî uygulamıştır. Melayê Cizîrî günlük konuşma Kürtçe'sinde de aruzu başarı ile uygulamıştır. İç kafiye, Melayê Cizîrî'de ayırt edici bir üslup özelliğidir. Melayê Cizîrî 31 şiirinde iç kafiyenin farklı altı şeklini uygulamış ve bu şiirlerinde recez bahrini kullanmıştır. Redif ve nakaratlar da Melayê Cizîrî şiirinde önemli ahenk unsurlarıdır. Bunların başında iade, aks, tekrar ve aliterasyon gelmektedir. Sonuç olarak Melayê Cizîrî şiirlerinde kuvvetli bir ahenk ve musiki elde etmiş, orijinal bazı üsluplar kullanmış ve bu alanda öncü olmuştur.

Anahtar Kelimeler: Melayê Cizîrî, ahenk, şiir musikisi, aruz vezni, ses tekrarı.

Destpêk

Aheng (di Îngilîzî de “harmonî”, di Erebî de “îqa”), taybetiyeke jê neger a hemû hunerên bedew e. Aheng, di edebiyatê de hêmaneke bingehîn a şêwaz û estetîka edebî ye û bi kurtî wek “rêkxistin û yeksaniya di nezm û pexşanê de ye ku bi bihîstina wê ruhê mirov hestiyar dibe” dikare bê pê nasekirin. Zanistên hunera edebiyatê yên wek kêş, serwa û paşserwayê û hunerên bedîî (hunerên edebî) yên wek tekrîr, îade, ‘eks û muwazeneyê bi ahengê re têkildar in û her yek ji wan aliyekî ahengê îfade dikin (Yetiş 1988, r. 516; Macit, 2016, r. 14-17; Şemîsa 1378, r. 154). Rabirdûya peyva ahengê di vê wateya berfireh de zêde ne kevin e. Di berhemên belaxeta klasîk de peyva ahengê nehatiye bikaranîn. Lêbelê hin muteradif, yan jî nêzwateyên wê hatine bikaranîn ku ew jî têgehên wek “insicam”, “tecanus” “teelluf” û “selaset”ê ne. Têgeha ahengê cara pêşî bi wateya xwe ya edebî ya navborî di dawiya Osmaniyan de di berhemên nezeriyeya edebiyatê de hatiye bikaranîn û bi vî awayî ketiye nav lîteratura edebiyata Tirkî (Yetiş 1988, r. 516; Macit, 2016, r. 14-17). Vê dawiyê ji aliyê Muhsin Macit ve li ser mijara ahengê bi navê *Divan Şiirinde Ahenk Unsurları* (Hêmanên Ahengê di Helbesta Dîwanê de) berhemeke serbixwe jî hatiye nivîsîn (Macit, 2016).

Ahenga metnê edebî, wek mûsîqîya metnê edebî jî hatiye binavkirin. Ji aliyê gelek teorîsyenan ve hebûna pêwendiyekê di navbera helbestê û mûsîqiyê de tê qebûlkirin. Li gor vê, di navbera elhan/usûlên mûsîqiyê û weznên erûzê de hevterîbiyek heye û hin usûlên mûsîqiyê bi hin weznên erûzê yên diyar tên bestekirin (Yetiş 1988, r. 516; Macit 2016, r. 81). Li gor feylesofên ku li ser mijarê hizrên xwe îfade kirine, hem elhan/usûlên mûsîqiyê, hem jî weznên helbestê li ser bingeha tenasubê (ahengê) ava dibin. Ev tenasub jî bi herikbariya nîzamî û periyodîk ya hereke û sukûnan di kelimê edebî û di nexmeya musîqiyê de çê dibe û ya yekem kêşa helbestê, ya duyem jî nexmeya mûsîqiyê derdixe holê (Zerqanî 1345, r. 143). Li gor ku Zerqanî vedugehezîne Farabî lehna mûsîqiyê beramberî beyta helbestê û nexme, yanî hêmanên lehnê jî beramberî herfên helbestê dibîne (Zerqanî 1345, r. 139). Hin teorîsyenên Rojava rîtma helbestê dişibînin rîtma mûsîqiyê û ji ber vê jî kêşê bi notayên musîqiyê nîşan didin (Wellek, r. 190). Formalîstên Rûs tevahiya rûdanên ahenga dengên bi têgeha orkestrasyonê îfade dikin (Wellek, r. 180). Teorîsyenê navdar ê edebiyatê Eliot jî ji aliyên curbicur ve di navbera rîtma helbestê û mûsîqiyê de hevbeşyan tesbît dike û bi giştî di şûna ahenga helbestê de mûsîqîya helbestê bi kar tîne (Eliot 2007, r. 137). Di encamê de tê dîtin ku ahenga metnê edebî û mûsîqîya metnê edebî ji hev cuda nehatine hizirkirin.

Aheng, di heman demê de wek hêmaneke bingehîn a şêwaznasîyê (stîlîstîk/sebkşinasî) jî tê qebûlkirin. Şaxa şêwaznasîyê ya bi ahengê re têkildar, di lîteratura Rojavayî de wek “phonostylistics/fonostîlîstîk” (Aytaç 2016, r. 82) û di lîteratura Îranî de wek “sebkşinasîyî awaha” tê binavkirin û “fonostîlîstîk (sebkşinasîyî awaha) jî beramberî mûsîqiyê tê dîtin (Şemîsa 1378, r. 154). Bêguman aheng hêmaneke bingehîn a estetîka edebî ye jî. Çawa tê zanîn estetîk (‘ilmu’l-cemal) bi kurtî wek zanista ku li ser regezên bedewiyê radiweste tê pênasekirin. Estetîk xwe di hunerê de nîşan dide û çawa ku estetîka hemû huneran heye, estetîka hunera edebiyatê jî heye. Ev estetîk jî bi aheng û yeksaniyê tê bidestxistin (Ayvazoğlu, r. 146).

Aheng di metnê edebî de bi şêweyên curbicur derdikeve holê ku ji wan re “hêmanên ahengê” (Macit 2016), yan “hêmanên mûsîqiyê” (Şemîsa 1378, r. 153) tê gotin. Ev hêman bi piranî li ser du beşan hatine dabeşkirin: Aheng/mûsîqîya derekî û aheng/mûsîqîya navekî. Ahenga derekî beramberî kêş, serwa û paşserwayê; ahenga navekî jî beramberî hunerên bedî’î yên wek cînas, îştîqaq, tekrîr, îade, ‘eks, muwazene û aliterasyonê tê qebûlkirin (Macit 2016, r. 19; Şemîsa 1378, r. 153). Li gor me ji ber ku ahenga serwa û paşserwayê jî wek cînas, tekrîr û hunerên dî yên bedî’î bi dubarekirina dengên çê dibe, ew jî di kategoriya wan de bê mitalekirin guncawtir e. Di edebiyata Rojava de hin teorîsyenên edebiyatê bi awayekî ku hem ahenga derekî, hem jî ahenga navekî vegire, di şûna ahengê de peyva “rîtm”ê bi kar tînin, hin teorîsyen jî rîtmê ewqas berfireh nagirin û wê tîne ji bo kêşê bi kar tînin. (Wellek, r. 185). Yên yekem “ahenga rîtmîk”, yanî kêşê wek “rîtma derekî” û “ahenga dengên”, yanî hêmanên bi dubarekirina dengên re têkildar jî wek “rîtma navekî” bi nav dikin û bi vî awayî rîtmê dixin du beş, lêbelê yên duyem ji ber ku ahenga dengên û rîtmê ji hev cuda dikin pêdivî bi dabeşkirineke bi vî rengî nabînin.

Îro li Kurdistanê Iraqê lêkolînerên edebiyatê rêbaza yekem dişopînin (Reşîd 2017, r. 19-41). Li gor me eger “rîtm” tenê ji bo dubarekirinên perîyodîk (maweyên diyarkirî), yanî ji bo kêşê bê bikaranîn û wek ahenga rîtmîk bê binavkirin guncawtir e. Di vê rewşê de kêşê dê bikeve kategoriya ahenga derekî, serwa û paşserwa jî wek hunerên bi dubarekirina dengên re têkildar dê bikevin kategoriya ahenga navekî. Lewra di serwa û paşserwayê de jî ya esas dubarekirina dengên e. Ji ber ku em wek têgeha vegir peyva aheng/mûsîqiyê bi kar tînin, pêdivî bi dabeşkirineke bi şêweya rîtma derekî û rîtma navekî namîne. Çawa ku di beşa wê de dê di pratîzekirin, di binemaya xwe de ahenga rîtmîk jî bi dengên re pêwendîdar e. Lewra rîtma helbestê bi dubarekirinên dengên perîyodîk tê bidestxistin (Wellek 2016, r. 185). Ji vî aliyê ve aheng û deng dibin du peyvên ku ji hev nayên cudakirin (lazimê xeyrê mufariq). Di encamê de dikare bê gotin ku wek têgeha vegir ne rîtm, bikaranîna aheng/mûsîqiyê guncawtir dixuye.

Herçiqas aheng û mûsîqî, çî menzûm çî pexşan, taybetiyeye giştî ya hemû metnên edebî ye jî, ji pexşanê zêdetir di nezmê de xwe nîşan didin. Bi taybetî di helbesta klasîk de tiştê ku helbestê ji pexşanê vediqetîne rîtm e. Loma aheng û mûsîqî wek taybetiyeye girîng a helbestê derdikevin pêş û ev taybetî xwediyê girîngiyeye mezin e. Helbestvan di hêz û qudreta xwe ya vegotinê de deyndarê aheng û mûsîqiyê ye. Eger ji kelimên helbestvan mûsîqî bê derxistin, di dest de tiştêkî hindik dê bimîne (Zerqanî 1345, r. 127). Ji ber ku aheng û mûsîqî xaleke girîng û jênera a şêwaz û estetîkê ye, helbestvanê di aheng û mûsîqiyê de serkeftî, di hunera helbestê de serkeftî tê qebûlîkirin. Ji bilî vê hin erkên aheng û mûsîqiyê jî hene. Nivîskar bi mebesta ku hizrên xwe bidin qebûlîkirin serî li vê şêwazê didin. Gelek caran hizrên gelekî baş ji ber ku ne di qalibê ahengê de tên gotin bandorê nakin. Herweha aheng metnê edebî hêsantir di hiş de dihele û dide jiberkirin. Di pexşanê de piştî ku naverok hat fêmkirin form têk diçe, lêbelê di helbestê de form her dimîne (Aytaç 2016, r. 72).

Bi qasî ku tê dîtin di nav Kurdan de ji aliyê hunerê ve herî zêde hunera edebiyatê û di nav wê de jî herî zêde hunera helbestê pêş ketiye. Berhemên tarîxa edebiyata Kurdî bi helbestvanan dagirtî ne. Bêguman di nav van helbestvanên Kurd de, bi taybetî di qada Kurdiya Kurmancî de, yê ku her zêde balê dikişîne Melayê Cizîrî ye. Melayê ku di sedsalên şazdehem û hivdehem de jiyana xwe li Cizîra Botan bûrandiye (ji bo jiyana û nasnameya wî bnr. Adak, 2013: 186-210), helbestvanekî damezirîner ê edebiyata Kurmancî ye û li gor agahiyên berdest di nav tevahiya edebiyata Kurdî de yekem helbestvanê xwedî dîwan e. Loma form, aheng û hunerên di yên helbestê ku berî wî di edebiyata Farişî de gihîştibûn lutkeyê, di edebiyata Kurdî de cara pêşî di destê Mela de dirûv girtine. Gelo ev helbestvanê ku di edebiyata Kurdî de ev rola tarîxî lîstiyê, di hunera helbestê de roleke çawa lîstiyê? Gelo girîngiya wî tenê ji damezirîneriya wî tê, yan di heman demê de ji hêza wî ya hunerê jî tê? Gelo eger Mela hunermendekî serkeftî be, di nav sîstema helbesta Îslamî de payeya wî çî ye? Ji ber girîngiya Melayê Cizîrî ya di tarîxa edebiyata Kurdî de, em dixwazin di vê gotarê de di çarçoveya bersivên van pirsan de li ser şêwaza wî ya aheng û mûsîqiyê analîzekê bikin.

Çawa ku Eliot jî amaje pê dike, ji ber ku di sazkirina helbestê de gava ku pêşî tê avêtin binyada rîtmîk e (Eliot 2007, r. 137), em ê jî di gotarê de pêşî cih bidin ahenga rîtmîk, piştî jî cih bidin ahenga denga.

I. AHENGA RÎTMÎK: KÊŞA ERÛZÊ

Rîtm, ew aheng e ku ji dubarekirinên yeksan û periyodîk tê bidestxistin. Mebest ji dubarekirinên periyodîk jî ew dubarekirin in ku di maweyên diyar de li pey hev tîrên rîtmîk (Wellek, r. 185). Di rîtmê de periyodîkbûna dubarekirinê xaleke heyatî ye ku ahenga rîtmîk ji ahenga denga cuda dike. Yeksanî jî wekhevîya jimara heceyên misrayê îfade dike. Rîtm di Kurdî de bi peyva “kêş”ê, di edebiyatên Rojhilatî de bi peyva “wezn”ê, di edebiyatên Rojavayî de jî bi peyva “metre” tê îfadekirin. Di edebiyata cihanê de sê sistemen kêşê hatine bikaranîn: Kêşa çendatî (demî), kêşa çawayî û kêşa birgeyî. Di van her sê kêşan de yeksaniya jimara heceyan esas e. Lêbelê digel vê di kêşa çendatîyê de dirêjahî û kurtiya dema birgeyan û di kêşa çawayîyê de jî bihêzî û bêhêziya birgeyan (kirpandina wan) jî li ber çavan tê girtin (Wellek r. 197; Reşîd 2017, r. 14-18). Îcar li nav Miletên misliman ên Rojhilatê yê wek Ereba, Fars, Tirk û Kurdan kêşa çendatîyê/kêşa erûzê) hatiye bikaranîn (Ji bo agahiyên berfireh derheqê kêşa erûzê de bnr. el-Haşîmî 1997, r. 8-105; Saraç 2016, r. 201-248). Loma Melayê Cizîrî jî wek helbestvanekî Rojhilatî ev cureya kêşê bi kar anîye û bi vê cureya kêşê mûsîqîya helbestên xwe saz kiriye.

1. Cihê Melayê Cizîrî di Tarîxa Kêşa Kurdî de

Melayê Cizîrî wek helbestvanekî edebiyatên Îslamî, di tevahiya helbestên xwe de kêşa erûzê bi kar anîye û bingeha mûsîqîya helbesta xwe bi vê kêşê avêtiye. Dema em li kêşa ku Mela bi kar anîye dinêrin, em dibînin ku ew di tarîxa edebiyata Kurdî de yekem kes e ku kêşa erûzê bi hemû regezên xwe û bi awayekî serkeftî bi kar anîye (Xeznedar 2002, r. 246). Berî Mela helbesta Kurdî ya ku bi Kurdiya Goranî/Hewramî hatibû nivîsîn, bi kêşa birgeyî bû ku li ser du aliyên pênc birgeyî (5+5) dihat dabeşkirin (Gerdi 1999, r. 254-255). Bi qasî ku tê dîtin berî Mela, wek awarteyekê, tenê Baba Tahir di dubeytiyên xwe de kêşa erûzê bi kar anîye, lêbelê wî jî di dubeytiyan de, wek taybetiyeke dubeytiyan, tenê ji behra Hezecê qalibê “Mefa’îlun mefa’îlun fe’ûlun” bi kar anîye (Fesaî 1373, r. 484-485.) Herçiqas berî Mela hebûna hin helbestvanên ku di kêşê de serî li erûzê dane diyardeyeke tarîxî jî be, ji wan helbestvanan yan qet helbest negihîştine me (wek Mîr Yeqûbê Zirkî), yan jî pir kêma helbest gihîştine me (wek Eliyê Herîrî). Loma di tarîxa edebiyata Kurdî de yekem helbestvanê ku kêşa erûzê bi terzê helbestvanên Îranî, bi hemû regezên xwe û bi awayekî serkeftî bi kar anîye Melayê Cizîrî ye. Di edebiyata Kurdî de piştî Mela helbestvanên di yê Kurmanc (Feqiyê Teyran, Melayê Bateyî û hwd), piştî wan jî helbestvanên Kurdiya Soranî (Nalî, Kurdî, Salim û hwd) û yê Kurdiya Zazakî (Xasî, Babij) kevneşopiya erûzê domandine.

Di tabloya jêrîn de behr û qalibên erûzê yê ku di *Dîwana Mela* de hatine bikaranîn digel jimara wan hatine nîşandan. Tablo li ser bingeha doneyên Helîma X. Ebdula hatiye amadekirin (Ebdula 2011, r. 271-281).

BEHR		QALIB				KOJIM		
J		J			Qalib	Behr	Giştî	
1	Remel	1	Fa'ilatun fa'ilatun fa'ilatun fa'ilun		13	55		
		2	Fa'ilatun fe'ilatun fe'ilun		11			
		3	Fa'ilatun fa'ilatun fa'ilatun fa'ilan		9			
		4	Fa'ilatun fe'ilatun fe'ilatun fe'ilan		8			
		5	Fa'ilatun fe'ilatun fe'ilatun fe'ilatun		3			
		6	Fa'ilatun fa'ilatun fa'ilun		3			
		7	Fa'ilatun fe'ilatun fe'ilan		2			
		8	Fa'ilatun fe'ilatun fe'ilan		2			
		9	Fa'ilatun fa'ilatun fa'ilatun fa'ilatun		1			
		10	Fe'ilatun fa'ilatun fe'ilatun fa'ilatun		1			
		11	Fa'ilatun fe'ilatun fe'ilatun fe'lun		1			
		12	Fa'ilatun fe'ilatun fe'lun		1			
2	Hezec	1	Mefa'ilun mefa'ilun mefa'ilun mefa'ilun		9	29	118	
		2	Mef'ûlu mefa'îlu mefa'îlu fe'ûlun		9			
		3	Mef'ûlu mefâ'ilun fe'ûlan		2			
		4	Mef'ûlu mefa'îlu mefa'îlun fe'		2			
		5	Mefa'ilun mefa'ilun		2			
		6	Mef'ûlu mefa'îlu mefa'îlu fe'lun		1			
		7	Mefa'ilun mefa'ilun mefa'ilun mefa'îlan		1			
		8	Mefa'ilun mefa'ilun fe'ûlan		1			
		9	Mef'ûlu mefa'îlu mefa'îlu fe'ûlan		1			
3	Recez	1	Mustef'ilun mustef'ilun mustef'ilun mustef'ilun		17	26		
		2	Mustef'ilun mustef'ilun mustef'ilun mustef'îlan		4			
		3	Mufte'ilun mefâ'ilun mufte'ilun mefâ'ilun		2			
		4	Mufte'ilun mefâ'ilun mufte'ilun mefâ'îlan		2			
		5	Mustef'ilatun mustef'ilatun		1			
4	Serî'	1	Mufte'ilun mufte'ilun fa'ilun		3	3		
5	Besît	1	Mufte'ilun fa'ilun mufte'ilun fa'ilun		2	2		
6	Muzâri'	1	Mef'ûlu fa'ilatun mef'ûlu fa'ilatun		2	2		
7	Xefîf	1	Fe'ilatun mefâ'ilun fe'ilun		1	1		

Tablo 1: Tabloya giştî ya behr û qalibên erûzê yên ku di Dîwana Mela de hatine bikaranîn.

Çawa tê dîtin, Mela di dîwanê de di 118 helbestan de 7 behrên erûzê, (komên erûzê) bi kar anîne ku ew jî remel, hezec, recez, serî', muzari', besît û xefîf in. Lêkolînerên Kurd ên Başûrî li ser erûza Kurdî hin xebatên îstatîstîkî kirine, bi riya xwendin û vekolîna berhemên helbestvanên Kurd ên navdar, behrên erûzê û qalibên wan behran ên ku di helbestên wan de hatine emilandin tesbît kirine. Eger em nîvekiya encama van lêkolînan derxin, dê derkeve holê ku di helbesta Kurdî de herî zêde û bi rêzê ev qalibên erûzê hatine bikaranîn: Hezec, remel, recez, muzari', muteqarib, xefîf, serî' (Herdî 2004, r. 105-194; Ebdula 2011, r. 215-261; Reşîd 2017, r. 60). Ji ber ku Ehmedê Xanî jî berhema xwe ya bi navê *Nûbihara Biçûkan* di çarçoveya fêrkirina kêşên erûzê de nivîsiye, behrên ku wî di wir de bi kar anîne ji bo erûza Kurmancî ya piştî Mela (sedsal XVII) fikreke baş dide me. Behrên ku Xanî di *Nûbihara Biçûkan* de bi kar anîne ev in: Hezec, remel, recez, muzari, besît, serî' û muteqarib. Lîsteya giştî ya edebiyata Kurdî, lîsteya Xanî û lîsteya Mela di tabloya jêrîn de dikare bê berawirdkirin:

Kêş di Edebiyata Kurdî de			
Jimar	Giştî	Xanî	Mela
1	Hezec	Hezec	Remel
2	Remel	Remel	Hezec
3	Recez	Recez	Recez
4	Muzari'	Muzari'	Serî'
5	Muteqarib	Besît	Muzari'
6	Xefîf	Serî'	Besît
7	Serî'	Muteqarib	Xefîf

Tablo 2: Behrên erûzê yên ku di helbesta Kurdî de hatine bikaranîn.

Bêguman behrên ku bi giştî di helbesta Kurdî de hatine bikaranîn ne heft heb tenê ne. Lêbelê behrên ku Mela di *Dîwanê* de û Xanî di *Nûbihara Biçûkan* de bi kar anîne bi qasî hev in (heft heb). Ji bo ku aheng saz bibe me ji behrên giştî yên edebiyata Kurdî heft hebên ku herî zêde hatine bikaranîn di tabloyê de bi cih kirine.

Dema em li tabloyê temaşa dikin, em dikarin bibêjin ku hemû behrên ku Mela bi kar anîne, pey wî re di helbesta Kurdî de di asta herî bilind de hatine bikaranîn. "Xefîf" a ku Mela bi kar aniye di nav lîsteya Xanî de tunebe jî, di nav lîsteya giştî ya edebiyata Kurdî de heye. Dîsa "besît" a ku Mela bi kar aniye herçiqas di heft behrên lîsteya giştî de tunebe jî, lêbelê di dewama lîsteyê de heye. Ev jî nîşan dide ku piştî Mela sîstema ku wî di kêşa erûzê de daniye hatiye şopandin û behrên ku wî bi kar anîne hatine bikaranîn.

2. Cihê Melayê Cizîrî li Hember Kêşa Farisî û Tirkî

Li vê derê em dê di çarçoveya tabloya jêrîn de kêşa Mela, bi kêşên helbesta Farisî û Tirkî re berawird bikin. Eger em ji aliyê behrên ku herî zêde di helbestên Farisî û Tirkî de hatine bikaranîn ve li tabloyê temaşa bikin, dê bê dîtin ku lîsteyên Farisî (Ebdula 2011, r. 158) û Tirkî (İpekten 2002, r. 346-348) bi tevahî wek hev e, lêbelê lîsteya Mela ji wan cuda ye. “Serî” û “besît”ên ku Mela bi kar anîne di listeyên Farisî û Tirkî de tunene. Herweha “recez”a ku di lîsteya Mela de di rêza sêyem de ye, di lîsteya Farisî û Tirkî de di rêza şeşem de û “xeffî”a ku di lîsteya Mela de di rêza heftem de ye, di lîsteya Farisî û Tirkî de di rêza pêncem de ye. Ev jî nîşan didin ku helbestvanên Tirk di kêşên erûzê de bi tevahî helbestvanên Faris şopandine, lêbelê Mela bi tevahî ew neşopandine û heta bi astekê di mûsîqîya kêşê de şewazeke xweser şopandiye.


Jimar	Helbesta Mela	Helbesta Farisî	Helbesta Tirkî
1	Remel	Remel	Remel
2	Hezec	Hezec	Hezec
3	Recez	Muzari'	Muzari'
4	Serî'	Muctes	Muctes
5	Muzari'	Xeffî	Xeffî
6	Besît	Recez	Recez
7	Xeffî	Munserih	Munserih

Tablo 2: Berawirdkirina behrên erûzê yên ku di helbestên Mela, Farisî û Tirkî de hatine bikaranîn.

Çawa tê zanîn di erûza Erebi de bi giştî 16 behrên erûzê hene (‘Ebdûn 2001, r. 32; Tebrîzî 2014, r. 16). Lêbelê di edebiyatên Farisî, Tirkî û Kurdî de sistema erebî bi tevahî nehatiye kopîkirin û tê de hin guherîn hatine kirin. Her helbestvanekî li gor xwe hin ji van behran û qalibên wan bi kar anîne. Dema em ji vî aliyî ve li Melayê Cizîrî dinêrin, em dibînin ku wî ji van behran heft behr bi kar anîne. Hafîzê Şîrazî ku *Dîwana* wî yek ji jêder û modelên edebî ye ji bo Melayê Cizîrî, ji van 16 behran 10 behr bi kar anîne ku ew jî ev in: Remel, muctes, muzari', hezec, recez, xeffî, muteqarib, munserih, muqtezeb (Ebdula 2011, r. 213). Eger em behrên Hafîz û Mela berawird bikin em dê bibînin ku li cem her duyan rêjeya “remel”ê bilind e û rêjeya “serî” û “xeffî”ê nizm e. Li aliyekî dî Mela “muctes” bi kar neaniye, lêbelê Hafîz di rêjeyeke bilind de bi kar aniyê, herweha Mela “besît” bi kar aniyê, lêbelê Hafîz bi kar neaniye. Ji vê jî tê fêmkirin ku Mela ji aliyê kêşê ve bi tevahî Hafîz neşopandiye û di vir de jî heta astekê xwediyê xweseriyekê ye.

3. Taybetiyên Kêşê di Helbestên Melayê Cizîrî de

Dema em di bikaranîna behr û kêşên erûzê de li tercîhên Mela dinêrin, em dibînin ku Mela 55 helbest bi remelê, 29 helbest bi hezecê, 26 helbest bi recezê, 3 helbest bi serî'ê, 2 helbest bi muzari'ê, 2 helbest bi besîtê û helbestek jî bi xeffîfê nivîsiye. Eger em van bi rêjeya sedeyî îfade bikin, remel %47, hezec % 24, recez %22, serî' %2, muzari' %2, besît % 2 û xeffîf %1 e. Ev yek di grafîka jêrîn de jî dikare bê şopandin.



Grafik: Rêjeyên behrên erûzê yên ku di Dîwana Mela de hatine bikaranîn.

3.1. Tercîha Qalibên Herikbar û Salim

Çawa di grafîka jorîn de jî tê dîtin, Mela, herî zêde behra remelê bi kar aniye. Li pey remelê jî bi rêzê hezec, recez, muzari', besît û xeffîf tên. Remel, hezec û recez piraniya helbestên wî saz dikin. Lewra kojima wan dike % 93. Ev jî nîşan dide ku Mela, di piraniya helbestên xwe de kêşên herî zêde herikbar bi kar anîne. Ji van her sê behran remel û hezec, hem di helbesta Farisî, hem jî di ya Tirkî de di rêza yekem û duyem de ne. Lêbelê recez di her duyan de kêm e, li cem Mela zêde ye. Xuya ye ku mûsîqîya rîtmîk a behra recezê gelekî li xweşiya Mela çûye û Mela ew behr bi taybetî ji bo hunera tesmîtê (serwaya hundurîn) terxan kiriye. Çawa li jêrê di beşa serwaya hundurîn de dê bê dîtin, Mela di helbestên xwe yên bi kêşa recezê de bi tevahî serî li serwaya hundurîn daye. Ev jî di şewaza Melayê Cizîrî de wek taybetiyeke wî ya xweser derdikeve holê.

Çawa tê zanîn di sîstema erûzê de her behrek çendîn qalibên kêşê vedigire. Dema em ji vî aliyê ve li helbestên Mela dinêrin, em dibînin ku rewş hevterîbê rêjeya behran e. Behra ku herî zêde hatiye bikaranîn di heman demê de xwendiyê qalibên zêde ye jî. Lewra Mela ji remelê 12, ji hezecê 9, ji recezê 5, ji serî', muzari', besît û xeffîfê jî yek qalib bi kar anîne. Kojima qalibên ku bi kar anîne bi giştî dibe 31. Ji van qaliban "mustef'ilun mustef'ilun mustef'ilun mustef'ilun" bi 17 qaliban di rêza

yekem û “fa’ilatun fa’ilatun fa’ilatun fa’ilun” jî bi 13 qaliban di rêza duyem de cih girtine. Taybetiya van her du qaliban ew e ku salim in. Dema em qalibên dî yên salim jî li ber çavan bigirin, em ê bibînin ku Mela di kêşê de zêdetir tercîha qalibên salim kiriye. Çawa tê zanîn di kêşnasiyê de ahenga qalibên salim, li gor yên nesalim zêdetir e. Lewra di vê rewşê de periyodên wek hev li pey hev tîrên rêzkirin ku ev jî tê wateya ahengeke tam Ji vê jî derdikeve holê ku Mela di helbestên xwe de qalibên ku ahenga wan zêde ye tercîh kirine. Bêguman ev yek jî di bihêzkirina mûsîqîya helbestê de roleke girîng dilîze.

3.2. Rola Zimanê Kurdî di Erûza Melayê Cizîrî de

Ji ber ku sîstema kêşa erûzê digel yeksaniya jimara birgeyan li ser dirêjahî û kurtiya birgeyan ava dibe, ev sîstem di zimanên ku fonîmên wan jî dengdêrên dirêj û kurt pêk tîrên de bi awayekî serkeftî tê çêkirin. Loma jî Kurdî wek zimanekî xwediyê fonîmên kurt û dirêj jî bo sîstema erûzê guncaw e. Bêguman Melayê Cizîrî dema erûz bi kar aniyê, jî vê avantajê zimanê Kurdî sîstema wergirtiye. Ji bo fêmkirina vê yekê rewşa zimanê Tirkî dikare bibe arîkar. Ji ber ku di zimanê Tirkî de tenê dengdêrên kurt hene, di heceyên dirêj ên kêşên erûzê de dengdêrên kurt her dem tûşî îmaleyê tîrên û ev yek ahenga ziman tîrên dibe. Li gor tesbîtên lêkolînerên edebiyata Tirkî, di edebiyata Osmanî de bikaranîna erûzê di dawîya Osmanîyan de di sedsala XIXem de bi destê kesên wek Tefîk Fikret, Mehmet Akif û Yahya Kemal kemiliye û helbestên jî aliyê erûzê ve serkeftî di wê serdemê de hatine dayîn. Lêbelê tam di wê demê de hêdî hêdî erûz jî holê rabûye (Levend 1984, r. 629, Macit, 2016, r. 79). Berevajiyê helbesta Tirkî di helbesta Kurdî de kêşa erûzê di destpêka xwe de bi awayekî serkeftî hatiye bikaranîn ku ev yek jî bi destê Melayê Cizîrî çêbûye. Di mînakên jêrîn de aşkera tê dîtin ku Mela, erûzê bi awayekî serkeftî bi kar tîrên. Eger bi taybetî li misrayên duyem ên îtalîk bê temaşekirin, dê bê dîtin ku digel ku ew misra bi Kurmanciyê sade ya rojane hatine nivîsîn jî, di wan de erûzeke bêqusûr hatiye bikaranîn. Ev yek hem guncawiya Kurdiya sade bo erûzê nîşan dide, hem jî wek şêwazeke ahenga Melayê Cizîrî dikare bê qebûlkirin.

Mustef’ilun mustef’ilun mustef’ilun mustef’ilun

Mihnetkeş îr roz û şebê der firqeta şîrînlêbê
Zulma ji ber destê te bê ew ‘edl e em pir pê xweş îr

Mefa’ilun mefa’ilun mefa’ilun mefa’ilun

Ji her bêdax û bêderdî mepirsîn mihneta ‘îşqê
Çi zanin bêxeber jana dilê dax û keser tê da

Fe’ilatun fe’ilatun fe’ilatun fe’ilun

Weh ku bê şahid û mehbûbê te ‘umrê xwe buwar
Karekî rabe bike weqt e ku êvar e dereng

Mela, di gotinên pêşyan ên Kurdî de jî ku bi zimanekî sade hatine îfadekirin, kêşa erûzê bi awayekî serkeftî bi kar aniye. Ev yek di misrayên pêşî yên beytên jêrîn de tê dîtin.

Fe'ilatun fe'ilatun fe'ilatun fe'ilun

Belku dîwar(i) bi guh bin bi Xudê kî bi Xudê

Bi tu rengî nekirî eşkere esrarê hudûs

Mef'ûlu fa'ilatun mef'ûlu fa'ilatun

Bêzî dîkit ji qencan ji remz û naz û xencan

Qedrê gulan çi zanit kerbeş divêt kerê reş

II. AHENGA DENGAN

Ahenga dangan ku kategoriya duyem a aheng û mûsîqîya helbestê ye, mijareke girîng a şêwaz û estetîka metnê edebî ye. Çawa ku Wellek jî dibêje, dubarekirina dangan di helbest û pexşana xemilandî de hêmaneke bingehîn a ahengê ye. Helbest wek organîzasyonê sîstema dengên zimanekî ye. Helbest û pexşana xemilandî li ser dubarekirina dangan ava dibin (Wellek & Warren, 2016, r. 179). Bêguman rêjeya dubarekirina dangan di helbestê de li gor pexşana xemilandî gelekî zêdetir e. Ev yek ji siruştên helbestê neşet dike. Di helbesta klasîk de ku Melayê Cizîrî jî yek ji nûnerên wê ye, gelek hêmanên ahenga dangan hene. Ji van hêmanan ên ku derdikevin pêş ev in: Serwa, serwaya hundurîn (tesmît), paşserwa, tekrîr, cînas, îştîqaq, î'ade, eks, muwazene, aliterasyon û hwd. Li jêrê em ê di nav helbestên Melayê Cizîrî de li pey şopa van hêmanên ahenga dangan biçin.

1. Serwa

Di zimanê Kurdî de serwa ji bo “qafiye”ya edebiyatên Rojhilatê û “reim”a edebiyatên Rojavayê tê bikaranîn. Wek têgeheke edebî serwa, ahengek e ku herî kêr di dawîya du misrayan de, yan jî di wî cihê ku wek dawîya du misrayan tê qebûl kirin de, bi dubarekirina hin dengên du peyvên cihêwate derdikeve holê. Peyvên ku di wan de dubarekirina dangan heye wek “peyvên serwayê” tînin binavkirin. Bêguman gelek erkên serwayê hene, lêbelê li vir a ji bo me girîng erka wê ya di saz kirina aheng û mûsîqiyê de ye. Serwa hêmaneke girîng a estetîk û ahenga helbestê ye. Ahenga serwayê ji dubarekirina dengên dawîya misrayan tê bidestxistin. Ji ber ku serwa di kenara beytê de cih digirin, wek “mûsîqîya kenarî” jî hatiye wesifkirin. Xwîner ji bilî zewqa ku ji aheng û mûsîqîya kêşê distîne ji aheng û mûsîqîya serwayê jî zewqekê distîne. Di kêşê de tenê ahengek a perîyodîk heye, lêbelê di serwa de digel ahenga rîtmîk a ku ji kêşê neşet dike, dubarekirina dangan jî heye. Ji ber vê bi saya serwayê bala xwîneran zêdetir bi bal aheng û mûsîqîya helbestê ve tê kişandin (el-Hasîmî 1997, r. 108-130; Mevlevî 1994, r.77-82; Saraç 2016, r. 265-275; Haşîmî 1390, r. 198-223)

Dema em ji aliyê serwayê ve li helbestên Melayê Cizîrî dinêrin, em dibînin

ku wî di helbestên xwe de bi 31 herfan/dengan serwa saz kiriye (Xeznedar 2002, r. 247) ku ev rêje di hunera helbestê de asteke bilind e û di heman demê de ji bo sazkirina dîwaneke helbestan jî şertekî jêneger e. Ji herfên serwayê yên helbestên Mela 24 heb dengên Kurdî ne (a, b, c, d, e, ê, f, g, h, î, k, l, m, n, p, q, r, s, ş, t, x, v, w, z) û heft heb jî dengên erebî ne ku ji aliyê kurdan ve hatine bikaranîn (ث /s, ح /h, غ /g, ص /s, ض /d, ط /t, ظ /z). Ji ber ku di helbesta klasîk de yekîtiya helbestê, bi yekîtiya dengê serwayê ku di dawîya hemû beytên helbestê de tê dubarekirin saz dibe, ji encama navborî derdikeve holê ku Mela piraniya dengên Kurdî û çend dengên erebî ku ketine Kurdî, di helbestên xwe de wek “dengê bingehîn” ê helbestê bi kar anîne. Ji bo ku di dîwanekê de monotonî rabe û di dengên serdestî helbestan de dewlemendiyek bê bidestxistin ev regezeke girîng e û Mela di vê regezê de jî bi ser ketiye.

Ji 118 helbestên Melayê Cizîrî, di dawîya 65 heban de serwa bi tena serê xwe û di dawîya 53 heban de jî serwa digel paşserwayê hatiye bikaranîn. Li jêrê ji bo serwaya bêpaşserwa helbesteke nimûne cih digire. Dema em li vê helbestê dinêrin, em dibînin ku di seranserê helbestê de di tevahiya peyvên serwayê de (‘îneyet, hîdayet, nîhayet, ayet, wîlayet, rîayet, sîrayet, şîkayet, rîwayet, kifayet û dîrayet) dengê “ayet” hatiye dubarekirin, bi vê şewazê di helbestê de yekîtiyek hatiye sazkirin û di tevahiya helbestê de aheng û mûsîqîyeke hevbeş hatiye bidestxistin:

Ewwel ku yarê da me yek zerreyek **‘îneyet**

Qîsmet me xemr û cam e di deftera **hîdayet**

Husn û cemalê canan nadêritin tu payan

Herçî nebit bîdayet esla nehin **nîhayet**

Feyda ‘ulûmê hikmet cama sedef ku gêra

Me j’destê muxbeçan dît bi Mishef û bi **ayet**

‘Arif heta nenoşî ji destê meyfiroşî

Xaib nebû ji hoşî peyda nekir **wîlayet**

Gunah û zuhd û tamat hilnagîrit xerabat

Kesê bi vî derî ret divê bikir **rî’ayet**

‘Îşqê ji herdu çeşman ewwel di dil eser kir

Lê zerre zerre axir sotin kir û **sîrayet**

Şakissilahi her dem bi kuştina Melê bit
Gazindeyan ji kê kim ji kê bikim **şikayet**

Cama di destê şahid jengê ji dil dişotin
Pîrê muxan ji rendan weh weh dikir **rîwayet**
Etwarê ‘îşq û mestî esrarê butperestî
Teqrîrê sed rîwayet nakit li bo **kîfayet**

Li yetmeinne qelbî ‘eynulyeqîn dibexşet
‘Eynul’eyan divêtin kafî nehî **dîrayet**

Mîrî û padişahî mûyek li nik Melayî
Nadim bi mulkê ‘alem yek zerreyek **‘înayet**

Li gorî rêzikên zanista serwayê, dubarekirina heman peyva serwayê li pey hev baş nayê dîtin. Pêwîst e helbestvan di nav peyvên cuda de hevbeşiya dengên saz bike. Lêbelê eger çend beyt bikevin navberê û peyvên dubarekirî ji hev dûr bikevin, wê demê heman peyva serwayê dikare bê dubarekirin. Dema em ji vî aliyê ve li helbestên Melayê Cizîrî dinêrin, em dibînin ku wî ev regeza serwayê, çend awarte ne di nav de, di piraniya helbestên xwe de bi awayekî serkeftî bi cih aniyê. Bo nimûne di helbesta jorîn de, di beytên pêşî û dawî yê helbestê de peyva serwayê (‘înayet) hatiye dubarekirin. Lêbelê ji ber ku her du peyv ji hev dûr ketine, ev wek qusûreke serwayê nayê dîtin.

2. Serwaya Hundurîn (Tesmît)

Carinan di xezel û qesîdeyan de ji bilî serwaya standart a helbestê, di nav beytan de jî serwayeke hundurîn tê sazîkirin ku ji vê cureya serwayê re “tesmît” û ji xezel û qesîdeyên bi rengî re jî “xezela musemmet” û “qesîdeya musemmet” tê gotin. Serwaya hundurîn li ser bîngeha tef’ileyên kêşa erûzê ava dibe. Çawa tê zanîn, di kêşa erûzê de qalibek di her du misrayên beytê de tê dubarekirin. Bi vî awayî qalibekî çar tef’ile, di beytekê de dibe heşt tef’ile. Îcar di musemmetan de pêwîst e ew qalibên erûzê yê ku di misrayekê de dibin çar parçe (tef’ile) û di beytekê de dibin heşt parçe bînan bikaranîn, da di dawîya her yek ji wan parçeyan de bi awayekî periyodîk serwaya hundurîn bê cîbicîkirin. Li vir xala girîng ew e ku di van tef’ileyên de ne dengê serwaya bîngehîna helbestê, dengên dawîya misrayên yekem tê dubarekirin. Yanî serwaya bîngehîna ku di misrayên duyem ên beytan de cih digirin bi serwaya hundurîn re hevkarîyê nake. Îcar ji ber ku wek taybetîyeye xezel û qesîdeyê her du misrayên beytên yekem ên helbestê muserre’, yanî hemserwa ne, di beytên yekem de serwaya hundurîn yan nayê cîbicîkirin, yan jî bi awayekî cuda tê cîbicîkirin. Bi kurtî di helbestên musemmet de di tevahiya beytan de serwaya hundurîn bi yek sîstemê tê cîbicîkirin, lêbelê beyta yekem derveyî vê sîstemê dimîne. Bêguman ev kêmasiyê naîne ser ahenga beyta yekem. Lewra beyta yekem bi hebûna tesrî’ê (hemserwatîyê) jixwe xwedîyê ahengeke bilind e

(el-Hasimî 1997, r. 135; Pala 2003, r. 349).

Di beytekê de serwaya hundurîn tunebe jî, ew beyt bi kêş û serwaya kenarî jixwe xwedîaheng e. Îcar dema li vê ahenga heyfî, ahenga serwaya hundurîn zêde dibe, mûsîqîya beytê digihîje asteke gelekî bilind . Ev yek di helbestên Mela de bi zelalî dê bê dîtin.

2. 1. Hêza Mela di Serwaya Hundurîn de

Serwaya hundurîn yek ji taybetiyên xweser ên şêwaza Melayê Cizîrî ye. Di çavkaniyê belaxetê de tenê behsa şêweyeke tesmîtê tê kirin ku ew jî hemserwabûna tefîleyên duyem û çarem ên misrayên yekem û tefîleya duyem a misraya duyem e (el-Hasimî 1997, r. 135; Pala 2003, r. 349). Lêbelê dema em li helbestên Mela dinêrin, em dibînin ku Mela di *Dîwana* xwe de şeş şêweyên serwaya hundurîn bi kar anîne. Bi rastî jî ev di şêwaza helbestê de dahênaneke orjînal û di mûsîqîya helbestê de jî asteke bilind e. Dikare bê gotin ku Mela bi hemû alternatîfên pêkan cih daye vê cureya serwayê. Di *Dîwana* Mela de bi giştî 31 helbest bi vê şêweyê hatine nivîsîn ku ev wek rêjeyeke bilind derdikeve pêş. Di van helbestan de bi awayekî siruştî qalibên erûzê yên heşt tefîle hatine bikaranîn. Qalibên erûzê yên ku Mela di van helbestan de bi kar anîne, digel jimarên bikaranînê, li jêrê hatine dayîn:

Mustef'ilun mustef'ilun mustef'ilun mustef'ilun/mustef'ilan	18 helbest
Mefa'ilun mefa'ilun mefa'ilun mefa'ilun	5 helbest
Mufte'ilun mefâ'ilun mufte'ilun mefâ'ilun	3 helbest
Mufte'ilun fa'ilun mufte'ilun fa'ilun	2 helbest
Fa'ilatun fa'ilatun fa'ilatun fa'ilun	2 helbest
Fa'ilatun fa'ilatun fa'ilatun fa'ilatun	1 helbest

Dema em li van qaliban dinêrin, em dibînin ku Mela herî zêde ji behra recezê ji qalibê “Mustef'ilun mustef'ilun mustef'ilun mustef'ilun” hez kiriye. Lewra kojima wê (18 helbest) bi qasî kojima her pênc qalibên dî heye. Mela bi taybetî bi saya vî qalibî aheng û mûsîqîyeke bihêz li helbestên xwe zêde kiriye. Ev qalibê ku Mela evqas zêde bi kar anîye, xwediyê hin taybetiyên otantîk e. Li gor pisporan ji kevin ve ev qalib di nav Ereban de wek qalibekî xwedî mûsîqîyeke zêde di helbest û stranê de hatiye bikaranîn. Ereban di rêwîtiyên xwe de ji bo hêştirên xwe bi vî qalibî stran digotin. Di mûsîqîya vî qalibî de roleke taybet a serwayê heye. Serwa wê ji peyvên kurt pêk tê û şêweya pêşketî ya nesra kurt a biqafiye (musece') e. Ev wezn di heman demê de di helbestên hemasî û qaremaniyê de jî hatiye bikaranîn (Zerqanî 1345, r. 142). Di çarçoveya rêjeya bilind a vî qalibî de, em dikarin bibêjin ku Mela, bi armanca bihêzkirina akustîka helbestên xwe, xwestiye ji taybetiyên vî qalibî sûd wergire ku ev jî helwesta Mela li hember mûsîqîya helbestê aşkera nîşan dide.

Di çarçoveya edebiyatên Îslamî de, ev şêwaz herî zêde di sahaya Îranê û Azeriyan de hatiye bikaranîn. Lewra em dizanin ku berî Mela kesên wek Se'dî û Mewlana di edebiyata Farisî de (Fesaî 1373, r. 569) û kesên wek Nesîmî û Fuzûlî jî di edebiyata Azerî de serî li vê şêwazê dane. Helbestvanên sahaya dewleta Osmanî zêde serî li vê şêwazê nedane (Macit 2016, r. 12). Ev jî nişan dide ku helbesta Mela ji sahaya Osmaniyan zêdetir taybetiyên sahaya Îran û Azeriyan hildigire.

2.2. Şêweyên Serwaya Hundurîn di Helbestên Mela de

Ji ber ku ji aliyê serwaya hundurîn ve beytên yekem ê helbestê û beytên mayî yên helbestê ji hev cuda ne, em ê li jêrê şêweyên van her du rewşan di musemmetên Melayê Cizîrî de bi awayekî berfireh tesbît bikin.

2.2.1. Di beytên Pêşî de

Çawa me got di musemmetan de beytên yekem azad in û derveyî sistema giştî ya helbestê ne. Di helbestên Mela de beytên yekem bi sê şêweyan serwadar bûne. Li jêrê mînakên her sê şêweyan hatine nişandan. Ji bo derfeta muqayeseyê piştî beytên yekem beytên duyem jî hatine dayîn. Di beytên nimûne de metnê Selman Dilovan esas hatiye girtin (Şemrexî 2010).

Şêwe 1: Di beytên yekem de serwaya hundurîn qet tune ye.

Fa'ilatun fa'ilatun fa'ilatun fa'ilun

1. Dilberê îro seher avête cergê min du **dox**

Yek li sîne, yek li dil da lew ji min tîn ax û **ox**

2. Ah û oxên min ji **dil tîn** lê ji ber tîra **qizil tîn**

Yan ji kovanên di kul **tîn** jê dizêt her xûn û **zox**

Şêwe 2: tef'îleya duyem a misraya yekem û tef'îleya duyem a misraya duyem

Di vê şêweyê de serwaya hundurîn di navbera tef'îleya duyem a misraya yekem û tef'îleya duyem a misraya duyem de heye.

Mustef'ilun mustef'ilun mustef'ilun mustef'ilun

1. Ahê ji derdê **dil dîkî** herçî nedî **azarê çerx**

Derbê li nêva **dil didî** lami'sîfet nûbarê **çerx**

2. Tîn sîneyan peykan nihîn amancê wan tîran em **în**

Dama belayê der kemîn her goşe dor **madarê çerx**

Şêwe 3: tef'îleyên yekem û duyem ên misraya yekem û tef'îleya duyem a misraya duyem

Di vê şêweyê de serwaya hundurîn di navbera tef'îleyên yekem û duyem ên

misraya yekem û tef'ileya duyem a misraya duyem de heye.

Mefa'ilun mefa'ilun mefa'ilun mefa'ilun

1. Newaya mutrib û **çengê** fixan avête xer**çengê**
Were saqî heta **kengê** neşoyîn dil ji vê **jengê**

2. Heyata dil meya **baqî** binoşîn da bi muş**taqî**
Ela ya eyyuhu's-**saqî** edir ke'sen we naw**ilha**

2.2.2. Di Tevahiya Helbestê de

Serwaya hundurîn a tevahiya helbestê, di *Dîwana Melayê Cizîrî* de bi şeş şêweyan hatiye bikaranîn. Li jêrê helbestên Mela yên ku bi van şêweyan hatine nivîsîn yek yek hatine nîşandan. Di helbestan de her du beytên pêşî yên helbestê hatine dayîn. Mebest ji vê ew e ku serwaya hundurîn a beyta pêşî û beytên mayî yên helbestê bê muqayesekirin û beyta yekem a helbestê bê dîtin.

ŞÊWE 1:

tef'ileya duyem a misraya yekem + tef'ileya çarem a misraya yekem

Di vê şêweyê de di misrayên yekem de du peyvên hemserwa saz dibin. Yanî serwaya hundurîn tenê di misraya yekem de ye. Ev şêwe di van pênc helbestên jêrîn de hatiye bikaranîn. Ji van helbestan tenê di ya yekem de beyta yekem bi şêweyê cuda xwediyê serwaya hundurîn e, di her çarên dî de beyta yekem bê serwaya hundurîn e.

Mufte'ilun fa'ilun mufte'ilun fa'ilun

1. Muxbeçeyên mey**firoş** her seherê tîn **sema**
Badexworan noşî **noş** mane li dorê **cema**

2. Hin gulê bo'en**ber in** hin di şîrîn **esmer in**
Hin guherê dane yin mislê Suheylê **sema**

Mustef'ilun mustef'ilun mustef'ilun mustef'ilun

1. Dilber şikîna şekerek fe qultu ya rûhî **meta**
Go min heta xatir hebit min go çi kim ez ba **heta**

2. Zulfan tu bes çîn **çîn bike** biskên muqabil **dîn bike**
Pêşkêşî yek zulfek te bin mulkê Xeten textê **Xeta**

Mufte'ilun mefâ'ilun mufte'ilun mefâ'ilun

1. Ahî ji destê wê sirê dil ji meyê hewale **kir**

Her çi li min kirî Mela camê meya du **sale kir**

2. Şengî bi nazê **meşşîha** misk û zubadê **weşşîha**

Rûy ma di bin piya ne hêj zêde li min **delale kir**

Mefa'ilun mefa'ilun mefa'ilun mefa'ilun

1. Ji mabeyna du ebrûyan dibînîm qabê qewseynê

Te'alallah binê remzê çi reng avête **mabeynê**

2. Binê nûnên li ser **sadan** ku katib goşe lê **badan**

Seraser qafi ta qaf e rimûza Hikmetil'**eynê**

Mefa'ilun mefa'ilun mefa'ilun mefa'ilun

1. Bi husna ehzenitteqwîm û zahir sûretê **zat î**

Nezer dî "ellem-el esma" we batin 'eynê mir'**at î**

2. Di pabûsa semensayê mi nêrî bejn û **balayê**

Le'ellî ebluxu'l-esbabe esbabe's-semawatî

ŞÊWE 2:

tef'ileya duyem a misraya yekem + tef'ileya çarem a misraya yekem + tef'ileya duyem a misraya duyem

Di vê şêweyê de di misraya yekem de du û di misraya duyem de jî yek, bi giştî di beytê de sê peyvên hemserwa saz dibin. Yanî serwaya hundurîn di her du misrayên beytê de ye. Di vê şêweyê de dema mirov peyvên serwaya hundurîn li bin hev rêz bike, beyt dikeve dirûvê murebbe'ekê. Di *Dîwana Mela* de 22 helbest bi vê şêweyê hatine nivîsîn ku ev rêjeyêke bilind e. Ji van helbestan di 18 heban de di beytên yekem de jî serwaya hundurîn heye, di çar heban de jî tune:

• Digel beyta yekem

Mustef'ilun mustef'ilun mustef'ilun mustef'ilun

1. Dîsa ji nû bêhal **e dil** saqî werîn cama **zucac**

Muştaqê xemra **al e dil** lê xwoşî anîbit **mîzac**

2. Saqî ku dêm mehweş **bitin** kagul ji şêva **reş bitin**

Qerqef bila **ateş bitin** em dê bi wê dil kîn '**ilac**

Mustef'ilun mustef'ilun mustef'ilun mustef'ilun

- 1.Çîn çîn kirin zulfên **siya** kesketlesa dîba**qeba**
Êdî nîşan nabin **xuya** têkil kirin lazim **seba**
- 2.Min dî seba dayê seher **madarê** bedrê kir du **ker**
Qewsûqezeh jê hate **der** dîsa be zulfan ra **teba**

Mustef'ilun mustef'ilun mustef'ilun mustef'ilun

- 1.Ahê ji derdê dil **dikit** herçî nedî azarê **çerx**
Derbê li nêva dil **didit** lami'sîfet nûbarê **çerx**
- 2.Tên sîneyan peykan nihîn amancê wan tîran em **în**
Dama belayê der kemîn her goşe dor **madarê çerx**

Mefa'ilun mefa'ilun mefa'ilun mefa'ilun

- 1.Newaya mutrib û **çengê** fixan avête xer**çengê**
Were saqî heta **kengê** neşoyîn dil ji vê **jengê**
- 2.Heyata dil meya **baqî** binoşîn da bi muşt**aqî**
Ela ya eyyuhe's-**saqî** edir ke'sen we **nawilha**

Mustef'ilun mustef'ilun mustef'ilun mustef'ilun

- 1.Xelqo li min kîn **şîretê** ew dilbera zerrînkemer
Min dî di halê xef**letê** hat der ji burcê wek qemer
- 2.Hat der ji burc û pencer**an** dil girt û da ber xencer**an**
Ev reng e halê dil**beran** lew 'aşiqan xûn bûn ceger

Mustef'ilun mustef'ilun mustef'ilun mustef'ilun

- 1.Selwa sehîqed xemmilî lew kemmilî mest**ane reqs**
Wer suhbetê ger qabil î dê bêt û ret ş**ahane reqs**
- 2.Mestane mestan noşanoş qerqef di caman hate **coş**
Ma dê bimînit kes li **hoş** weqtê ku bîn dur**dane reqs**

Mustef'ilun mustef'ilun mustef'ilun mustef'ilun

1. Dîsa li bedrê **katîbî** kêşa ji nû **jengarê xet**
Nûr e reşandî **Wahîbî** der girdîşê **perkarê xet**

2. Herfên ji qudret nuqte **pur** madarê hewza le'î û **dur**
Ev rengi kê dî weh bi **sur** qudretnumûn **zengarê xet**

Mufte'ilun mefâ'ilun mufte'ilun mefâ'ilun

1. Xûn ku ji dil bi mewci **bêt** eşkê rewan me têne **xet**
Nîli ji dîdeyan diz**êt** keftime navê şubhê **bet**

2. Katîbê neqşê qudretê zêri reşandî ser **xetê**
Erzen û dêm û cebhetê pê neqqîşand û kir nuqet

Mufte'ilun mefâ'ilun mufte'ilun mefâ'ilun

1. Ser didit abê kewserê zemzeme û semayê **zulf**
Sayenumayê xawerê sidrê muntehayê **zulf**

2. Sayenumayê cebhetê neqş û xetê ji qudretê
Nuqte û herf û cezme **tê** bal û perên humayê **zulf**

Mustef'ilun mustef'ilun mustef'ilun mustef'ilun

1. Îro ji şehkasa surê mey hate fincana sedef
Minnet ku dîsa dêmdure da min meya husna xwe **xef**

2. Xef da me cama Kewserê şîrînqed û lebşekerê
Bayê seba da çenberê hatin sema şetrî û **lef**

Mustef'ilun mustef'ilun mustef'ilun mustef'ilun

1. Îro ji remza dêmdure minnet ku min mesrûr **e dil**
Dilber bi fincana **surê** mey da me û mexmûr **e dil**

2. Remzek nihîn avêhte **dil** mîhrê ji batin mêhte **dil**
Şehzadeyê sur **rêhte dil** şehkaseya ferfûr **e dil**

Mustef'ilun mustef'ilun mustef'ilun mustef'ilun

1.Îro ji husna dilberê dîsa helak û serxweş **în**
Remzên di wê şîrînsurê sohtim bi pêta **ateşîn**

2.Sohtim bi berqa lami'e ew necm û bedra tali' **e**
Şemsa semayê rabi' **e** lew pur ji şewqê şewwişîn

Fa'ilatun fa'ilatun fa'ilatun fa'ilatun

1.Muhbetê mihnet di **zor in** hub dibêm bêşek bela **ye**
Umr û jî xweş pê diborin sotin û derd û cefa **ye**

2.Sotin û derdê evînê 'illetê dax û birînê
Xweş dibin ma ew bi dînê şerbeta lêvan mufa **ye**

Fa'ilatun fa'ilatun fa'ilatun fa'ilun

1.Dilberê serdarê xûban ez nizam ageh **heye**
'Arif e b'halê qulûban 'alim e b'halê **me ye**

2.'Alim e b'daxê fuadan gezmeyên wan nûn û **sadan**
Çûne dil hetta bi radan yengiyê reşgoşe **ye**

Mustef'ilun mustef'ilun mustef'ilun mustef'ilun

1.Îro ji derba xencerê lazim bi êşan **î Mela**
Teşbîhê zulfa dilberê zanim perîşan **î Mela**

2.Zanim perîşan **î ji dil** bê hed bi êşan **î ji dil**
Teşbîhê buryan **î ji dil** billah ne insan **î Mela**

Mefa'ilun mefa'ilun mefa'ilun mefa'ilun

1.Xema 'îşqê perêhtim **ez** hebîba xemrevîn **kanê**
Seraser têk behêtim **ez** ji derdê ferq û hicranê

2.Fîraqa dilbera rend e behêtim her wekî finde
Musilmanik di rê min de xeber bit balê sultanê

Mustef'ilun mustef'ilun mustef'ilun mustef'ilun

1. Îro ji nû **purateş im** dîsa ji remza **dilberê**
Mecrûhê qewsê **purweş im** tîr dane nêva **cegerê**
2. Tîr dan ji qewsê **eswed e** şehzadeya **şîrînced e**
Kuştîne wek min çend**sede** wê padişah û **beglerê**

Mustef'ilun mustef'ilun mustef'ilun mustef'ilun

1. Ellah sehergaha **ezel** yelmûmê 'işqê şu'**le da**
Nûra cemala lem **yezel** zatê tecellaya **xwe da**
2. Zatê tecella bû li **zat** bêism û asar û **sifat**
Sirra hurûfên 'aliyat xef bû di **sitr** û **perde da**

• **Ji bilî beyta yekem**

Mustef'ilun mustef'ilun mustef'ilun mustef'ilun

1. Meşşateê husna **ezel** çengalê zulfan **tab(i) da**
Da 'işqi hil bit pêli pêl qelbê me pê **cellab(i) da**
2. Husna hebîb û lutfê yar avête dil 'işqa xedar
Lew selbi kir jê **ixtiyar** wê husnê ev **îcab(i) da**

Fa'ilatun fa'ilatun fa'ilatun fa'ilun

1. Dilberê îro seher avête cergê min du **dox**
Yek li sîne, yek li dil da lew ji min tên ax û **ox**
2. Ah û oxên min ji **dil tên** lê ji ber tîra **qizil tên**
Yan ji kovanên di **kul tên** jê dizêt her xûn û **zox**

Mufte'ilun fa'ilun mufte'ilun fa'ilun

1. Şahidê qudsînîşan husn e ji remza **ezel**
Da me bi destê surê camê meya lem **yezel**
2. Mey ku biçit **saxerê** di destê wê **dilberê**
Sondê bi Xaliq dixum roj e di burca **Hemel**

Mefa'ilun mefa'ilun mefa'ilun mefa'ilun

1. Ji remza dilberê dîsa li min batin vejîn **derde**
Di lebsê tariyê min dî xuya bû ew siyah**cerde**

2. Di lebsê tarî û **nûrê** perîrengê sifeth**ûrê**
Ji wadê Eymena **Tûrê** muqeddes kir li min '**erde**

ŞÊWE 3:

- **Misraya Yekem: tef'ileya yekem + tef'ileya duyem + tef'ileya sêyem + tef'ileya çarem**

- **Misraya Duyem: tef'ileya yekem + tef'ileya duyem + tef'ileya sêyem**

Di vê şêweyê de serwaya hundurîn, di her çar tef'ileyên misraya yekem de di nav xwe de ye û di her sê tef'ileyên pêşî yên misraya duyem de jî di nav xwe de ye. Bi vê şêweyê du helbestên Mela hene:

Mustef'ilun mustef'ilun mustef'ilun mustef'ilun

Yarê me **pur** nîşan û **sur** sîma ji **dur** dêm kew**keb e**
Ew lebşeker nazikbeşer cebhetseher kagul**şeb e**

Şebkagul **e** xalfulful **e** çînsunbul **e** dava **dil e**
Min xefletê dî qibletê wek mah ditêsa xeb**xeb e**

Mustef'ilun mustef'ilun mustef'ilun mustef'ilun
Min dî seher şahê Mecer libsê di **ber** mexmûr**(i) bû**
Ew dêm-zerî sur-muşterî ya Reb perî ya hûr**(i) bû**

Hûrîweş **e** şîrînmeş **e** kakulreş **e** xalhebeş **e**
Xalên di **qer** miska Teter nazikbeşer kafûr**(i) bû**

ŞÊWE 4:

tef'ileya yekem a misraya yekem + tef'ileya duyem a misraya yekem + tef'ileya sêyem a misraya yekem + tef'ileya çarem a misraya yekem + tef'ileya yekem a misraya duyem + tef'ileya duyem a misraya duyem + tef'ileya sêyem a misraya duyem

Di vê şêweyê de tef'ileya heştam ne tê de, di dawiya her heft tef'ileyên dî yên beytê de bi yekpareyî serwaya hundurîn heye. Dema peyvên serwayê yên

beytekê li bin hêv bên rêzêkirin, dirûvê musemmenê pê dikeve. Di vê şêweyê de aheng û mûsîqîya ku ji dengên serwaya hundurîn tê bidestxistin digihîje lutkeyê. Bi vê şêweyê du helbestên Mela hene:

Mustef'ilun mustef'ilun mustef'ilun mustef'ilun

1. Min dî ji **xeflet** cam di **kef** Şahê **Necef** dil kir **hedef**

Roj hat **şeref** stêr bûne **xef** her çar **teref** nûra **yeqeq**

2. Zulmet **nema** suhbet **we ma** nûra **şemalan** çû **sema**

Lê ew **dema** zulf bûn **cema** hatin **semayê** yekneseq

ŞÊWE 5:

tef'ileya duyem a **misraya** yekem + **tef'ileya** çarem a **misraya** yekem +
tef'ileya duyem a **misraya** duyem + **tef'ileya** çarem a **misraya** duyem +
tef'ileya duyem a **misraya** sêyem + **tef'ileya** çarem a **misraya** sêyem +
tef'ileya duyem a **misraya** çarem + **tef'ileya** çarem a **misraya** çarem +
tef'ileya duyem a **misraya** pêncem + **tef'ileya** çarem a **misraya** pêncem +
tef'ileya duyem a **misraya** şeşem + **tef'ileya** çarem a **misraya** şeşem +
tef'ileya duyem a **misraya** heftem + **tef'ileya** çarem a **misraya** heftem

Di vê şêweyê de serwaya hundurîn di bendan de hatiye cîbicîkirin û tef'ileyên duyem û çarem ên hemû misrayên bendekê bi yek serwayê hatine sazîkirin. Ji bilî vê wek taybetiya forma terkîb bendê, di navbera misrayên wasîteyê de jî serwayeke hevpar a cuda heye. Ev şêwe jî hem orjînal e, hem jî aheng û mûsîqîyeke bilind bexşî helbestê dike. Bi vê şêweyê terkîb bendeke Mela ya 12 bendî heye ku li jêrê du bendên wê hatine dayîn.

mustef'ilun mustef'ilun mustef'ilun mustef'ilun

1

Îro mi dî weqtê **seher** ew dilbera **sundus** di **ber**

Dîsa di lebsê sor û **zer** nûrek **munezzeh** bû **beşer**

Biskên siyah xalên di **qer** reşkagulê zulf çûne **ser**

Eswed bû daîm **secde ber** min bestî 'eqda **niyyetê**

Xeflet bi sir da min **nezer** mêran bi qetlê kir **xeder**

Tîr dane dil **şahê Mecer** bê mirwet **amanc** kir **ceger**

Feryad û efxan **sed keser** wesfan **neşêm** lê ev **qeder**

Zanim ku roj bû hate der **subhan** ji **şahê** **qudretê**

2

Subhan ji te şahê celal hostayê pur qudret li bal
Xasa te dayî ev cemal dêmê ji qudret xett û xal
Kifş bû di qewsê da hilal vê ra mi dî bedra kemal
Lê bûn nîqab çewkan û dal wan yek bi mestî daye pal
Lê seyirî bayê şimal pêçane ser nûra zelal
Qet kes diyin ev rengmîsal mutrib were weqt e w'mecal
Zaza bi nayê ra binal saqî werîn xemra helal

Carek ji ser dêmê vimal zulfên li dora cebhetê

ŞÊWE 6: Tenê di hin beytên helbestê de

Mela carinan serwaya hundurîn ne di tevahiya helbestê de, tenê di hin beytên helbestê de cîbicî kiriye. Sê helbestên Mela bi vê şêweyê hene. Li jêrê wek nimûne helbestek ji van cih digire:

Di dest da yengiyek nûbarî min dî ew kemandebrû
Li bala cedwelek Cebbarî lêda hemqiran ebrû

Ku Heq ev herf û xet kêşan li talayê me derwêşan
Du qewsan goşe lê badan we ser peyweste man ebrû

Te dîdarê te reftarê te elemasên şekerbarê
Bi 'eynî rê li ser sadan du nûn reyhan numan ebrû

Bi hemdillah bi feyrozî li wechê dilberê min dî
Ku mahê nû nîşan min dan li taqê asîman ebrû

Te'alellah nîşan dane bi husnê ev neseq dane
Ji neqş û sen'etê Heq ev nîşançeşm ev nîşanebrû

Ji re'na nêrgizên şehla mecalê hemqeran bînim
Hezar remz û îşarat in ji wan qewsên çevan ebrû

Mela dil têk te peykan in ji mehbûban me nîşan in
Kemendarên di xeddar in di burca esmeran ebrû

Her du helbestên dî jî weha dest pê dikin:

Ewwel ku yarê da me yek zerreyek ‘înayet
Qismet me xemr û cam e di deftera hîdayet

Wella ji herdu ‘aleman min husnê canan e xered
Lew min ji husna dilberan her sun’ê Rehman e xered

3. Paşserwa

Pîştî serwayê û di dawiya misrayan de ji her cure dubareyên ku tên kîrin re paşserwa (redîf) tê gotin. Tiştên ku tên dubarekirin xwedî wate ne û di hevokê de erkeke hildigirin ser milê xwe. Di paşserwayê de dengên ku tên dubarekirin, carinan ji qertafan, carinan ji qertaf û bêjeyan, carinan jî tenê ji bêjeyan pêk tên. Formên duyem û sêyem aheng û mûsîqîya helbestê bihêztir dikin. Paşserwa jî wek serwayê mûsîqîya kenarî ya beytê saz dîke û ji bilî kêş, serwa û serwaya hundurîn wek hêmaneke dî ya ahengê derdikeve pêş û bi saya wê aheng hê jî zêdetir dibe. Ji ber ku paşserwa di tevahiya helbestê de tê dubarekirin, di helbestê de ahengeke yekpareyî derdixe holê (el-Haşîmî 1997, r. 108-130; Mevlevî 1994, r.77-82; Saraç 2016, r. 265-275; Haşîmî 1390, r. 198-223).

Ferqa serwayê ji paşserwayê ew e ku dengên ku tên dubarekirin watedar in. Dema em ji vî aliyê ve li paşserwayên ku Mela bi kar anîne dinêrin, em dibînin ku sê şêweyên wan hene: Hin ji wan peyvên sade ne ku di jiyana rojane de tên bikaranîn û wateya yekem û ya heqîqî didin. Wek “da”, “girt”, “kir”. Hin ji wan wateyên taybet didin û ji termên felsefî û nezerî pêk tên. Wek “hudûs” û “xered”ê. Hin ji wan jî komepeyv û hevokên dirêj ên xwedî mesaj in. Wek “Dil ji min bir dil ji min”. Bêguman ji aliyê mûsîqîya helbestê ve her du şêweyên dawî girîng in û ji bilî ahengê mesajekê jî didin. Bo nimûne dema di helbestê de paşserwa “xelet” be, di tevahiya wê helbestê de mesajê xeletiyê tê dayîn. Şêweya duyem a paşserwayên Mela bi taybetî gelekî orjînal in. Çawa hat gotin Mela di wan paşserwayan de peyvên felsefî û razber ên wek “‘ebes, xered, behs, reqs, çi hez û xelet” bi kar anîne. Ev yek wek taybetiyêke şêwaza Sebkê Hindî jî tê zanîn ku di sedsala XVIem de di serdema Sefewîyan de belav bûye (Fesaî 1373, r. 569). Digel ku di serdema Mela de Sebkê Hindî bandora xwe tam nîşan nedabû jî, bikaranîna vê şêwazê ji aliyê Mela ve wek xweseriyêke wî di sebkşinasiyê de dikare bê dîtin.

4. Şêweyên Têkel

4. 1. Serwaya Hundurîn û Paşserwaya

Mela di du helbestan de aheng û mûsîqîyeke taybet ji serwaya hundurîn û paşserwayê saz kiriye. Di helbesta yekem de formula hevahengiyê bi vî rengî ye: **tef’ileyên yekem, duyem û çarem ên misrayên yekem û tef’ileya duyem a misraya duyem û paşserwaya komepeyv**

Şox û şengê zuhrerengê *dil ji min bir dil ji min*

Awirên heybetpelengê *dil ji min bir dil ji min*

Wê şepalê miskixalê dêmdurê gerdenşemalê

Cebheta biskan sema *lê dil ji min bir dil ji min*

Zulf û xalan nûn û dalan wan ji min dil bir bi talan

Goşê qewsê hilalan *dil ji min bir dil ji min*

Di helbesta duyem de jî formula hevahengiyê bi vî rengî ye: **tef'ileyên duyem û çarem ên misrayên yekem û tef'ileya duyem a misraya duyem û paşserwaya komepeyv**

Vê firqetê ebter kirîn *feryad ji destê firqetê*

Jar û zêf û zer kirîn *feryad ji destê firqetê*

Pur zer kirîn wek zêri mam çehvên di lutfê pîri mam

Daîm li rê çavnêri mam *feryad ji destê firqetê*

Çavnêrê reftara te bûm muştqaqê gulzara te bûm

Lew dûr ji dîdara te bûm *feryad ji destê firqetê*

4. 2. Serwaya Hundurîn û Neqerat

Mela di terkîb-bendekê de aheng û mûsîqiyeke taybet ji serwaya hundurîn û neqeratê saz kiriye. Di vê helbestê de jî formula hevahengiyê bi vî rengî ye:

- tef'ileyên, duyem û çarem ên misrayên yekem û duyem di nav xwe de
- tef'ileyên, duyem û çarem ên misrayên sêyem û çarem di nav xwe de
- tef'ileyên, duyem û çarem ên misraya pêncem
- neqerat

Di seranserê vê helbestê de tekrîra îfadeya “sebahulxeyr(i) ya xanim” çêjeke cuda dide ahengê. Ev îfade ji bilî ku di hemû misrayên pêncem de di her du tef'ileyên dawî de hatiye dubarekirin, di destpêkên misrayên yekem ên her du bendên pêşî de jî hatiye bikaranîn. Bi vî wî awayî peykera helbestê li ser wê îfadeyê ava bûye û bikaranîna di destpêkê de jî rola sernav lîstiyê.

Sebahulxeyr(i) xanê min şehê şîrînzabanê min
 Tu wî rûh û rewanê min bibit qurban te canê min
 Te'alElla çî zat î tu çî wê şîrînsifat î tu
 Ne wek qend û nebat î tu yeqîn rûh û heyat î tu
 Heyat û raheta *canim sebahulxeyri ya xanim*
Were bînahiya çehvan bibînim bejn û balayê

Sebahulxeyr(i) mesta min letîfa cam bi desta min
 Xumar û meyperesta min tu wî meqsûd û qesta min
 Ji meqsûdan tu wî bes min bibin ber çerxê etles min
 Ji xeyrê te nevêt kes min bi reştûzên muqewwes min
 Di benda zulfê çewkan im *sebahulxeyr(i) ya xanim*
Were bînahiya çehvan bibînim bejn û balayê

Ji wê zulfê ji wê bendê reha bim lê ji peywendê
 Siyehçêsmê sipîzendê te sohtim şubhetê fendê
 Şubhê şem û şemal im ez ji ber hubba te lal im ez
 Ze'îf im wek hilal im ez sifetgoyîn dikalim ez
 Vî bulbul ra bi evxan im *sebahulxeyr(i) ya xanim*
Were bînahiya çehvan bibînim bejn û balayê

Vî bulbul ra şev û rojê li ser wê terh û bişkojê
 Enîmahê şefeqrojê te sohtim şubhetê dojê
 Ko dûr im ez ji wê hûrê tinê carek li ser sûrê
 Ji Wadê Eymena Tûrê tecella kir di nêv nûrê
 Ji wê sohtî dil û canim *sebahulxeyr(i) ya xanim*
Were bînahiya çehvan bibînim bejn û balayê

Ji husna wê tecellayê yedê beyda û balayê
 Çî wesfan bêm xeber nayê welê dil cezbeê dayê
 Ne hişyar im ji wê berqê ji zertacê li ser ferqê
 Sipêde da heta şerqê belê naêximê ferqê
 Ji derbê 'îşqê nalan im *sebahulxeyr(i) ya xanim*
Were bînahiya çehvan bibînim bejn û balayê

Zerîf î nazik î **şeng** î sifethûr î perî**reng** î
 Bi rojê ra tu hevdeng î du reştûzên siyehyeng î
 Kîşandin lê ne wek **caran** xedengên qewsê nûbaran
 Ji rengê şîr û mû**karan** reşandin sîne wek **baran**
 Ji wê derbê pur êşan **im sebahulxeyr(i) ya xanim**
Were bînahiya çehvan bibînim bejn û balayê

Veke carek xet û **xalan** li ser wan mesned û **palan**
 Bixwûne lê me ‘ebd**alan** bibînin ‘îd û sers**alan**
 Îcazet dî me destû**rê** perîrengê sifethû**rê**
 Ji nêva zulmet û nû**rê** binosîn mey di ferfû**rê**
 Ji dil talanê **xalan im sebahulxeyr(i) ya xanim**
Were bînahiya çehvan bibînim bejn û balayê

Ji şehkasa ku qerq**ef tê** meya nûrîn muşerref **tê**
 Nîşanek dilberê **keftê** ji bo min her seher xef **tê**
 Ji wê camê dinoş**im ez** seher lew ney li hoş **im ez**
 Ji ‘amê lê dipoş**im ez** bi can her lê dikoş**im ez**
 Ku xalib mest û sukran **im sebahulxeyr(i) ya xanim**
Were bînahiya çehvan bibînim bejn û balayê

Were pêşber Melayê **xwe** şehîd û mubtelayê **xwe**
 Bi şefqet ke lîqayê **xwe** Mela nemrit bi dayê **xwe**
 Mesîha yî li bîmaran kesên geztî du reşmaran
 Şehîdên şîr û mû**karan** kirî amancê nûbaran
 Li dîdara te heyran **im sebahulxeyr(i) ya xanim**
Were bînahiya çehvan bibînim bejn û balayê

4.3. Wasite û Paşserwa

Di tercî’-bandan de misrayên wasiteyê di navbera hemû bandan de dubare dibin. Dema di hemû misrayên bendê de paşserwa jî dubare dibin di helbestê de mûsîqiyêke taybet zal dibe. . Sê helbestên Mela bi vî rengî hene (du tercî’-terkîb û tercî’ek). Li jêrê wek nimûne bendek digel misrayên wasiteyê cih digire:

Me bi dil nêrgizên xasse **divên**
 Semen û yasimînê taze **divên**
 Nazik û neyşekerên tuhfe **divên**

Sosinên nazik û terwende **divên**
 Dilberên dêmdur û durdane **divên**
 Kewkebên şewq û şefequhre **divên**
 Nazê perwerde û şehzade **divên**
 Sayeperwerde me bêperde **divên**
 Serwîqed dêmgul û lebxunçe **divên**
 Ayetullahê şerîfnusxe **divên**
 Lê bi î'rab û xet û cezme **divên**
 Dilrubayan ne tinê xemze **divên**
 Bi Mesîhasifetî işwe **divên**
 Samirî sihrisifet şêwe **divên**
 Senemên sur ji Semed her me **divên**
 Ji me eswedheceran secde **divên**
 Bi ziyaret me ji wan bûse **divên**
 Turreya şeng î dil'aşufte **divên**
 Mihridarên xwe di pejmûrde **divên**
 Pêşkişa te me dused nafe **divên**
 Sed hezar etles û hem xare **divên**
 Her li bo zînet û xemla te **divên**

Textebend û sifetên qeyseriyê
Dînberê horîmîsalê zeriye
Nazikê neyşekerê surperiyê

Li jêrê misrayên wasiteyê yên her du helbestên dî jî cih digirin:

Senema sur ji Semed şewqê ji Heq daye wucûdê
Ger 'Ezazîlî bidîta nedibir xeyrê sucûdê

Ew e min rûh û heyat û ew e min qibleê zat
Senema sur ji Semed neyşekera leb ji nebat
Ehesenellahu tebarek ji sura wê senemê

5. Hunerên Bedî'î yên bi Ahengê re Têkildar

Ji bilî ahenga ku ji kêş, serwa, serwaya hundurîn, paşserwa û neqeratan tê bidestxistin, ji hin hunerên bedî'î (hunerên edebî) jî ahengeke cuda tê bidestxistin ku ew jî di çarçoveya ahenga dengana û mûsîqîya helbestê de tên mitalekirin. Em ê li vir di *Dîwana Melayê Cizîrî* de tenê di çarçoveya hunerên î'ade, 'eks, tekrîr û alîterasyonê de ji bo ahenga ku ji van hunerên edebî tê bidestxistin çend nimûneyan pêşkêş bikin. Bêguman dema mûsîqîya van huneran li mûsîqîya ku ji hêmanên di yên ahengê tê bidestxistin zêde dibe, çêjeke cuda tê bidestxistin.

1. Î'ade

Eger di helbestekê de bêjeya dawî ya beytekê, yan bendekê di serê beyt, yan benda peyrew de bê dubarekirin ew dibe hunera "î'ade"yê. Di î'adeyê de peyv bi tevahî tê dubarekirin. Lêbelê eger hin cudahiyên buçûk hebin, bo nimûne di serî yan dawîya peyvekê de edatek hebe û di ya di de tunebe, ew zererê nade hunera î'adeyê (Saraç 2016, r. 263).

Li jêrê ji bo hunera î'adeyê di helbestên Melayê Cizîrî de, çend nimûne cih digirin:

-

Ez dibêm 'Îsa ye ew ya Bû 'Elî Sîna ye ew
Lew bi remz û 'îşweyan pur mu'cizat û **şêwe** ye

Şêwe û remzên di wê teşbîhê berqê lami' in
Kohê Qaf bit ker dikit sata xuya bit **perde** ye

Perdeya mehbûb di nêv qelban ku dê kerker bikit
Qet di perdê xef dibin Xurşîd û Mah û **Zuhre** ye?

Zuhre û Xurşîdî min dîtin di qewsê hemqeran
Surrê da dil 'eqreban çerx û sema û heyhey e

-

Kuştim bi qewsê 'enber e şoxê ji dil mil dan ber e
Êxiste dil sed pencere ev renga em **mihnetkeş î**n

Mihnetkeş în roz û şebê der firqeta şîrînlebê
Zulma ji ber destê te bê ew 'edl e em pur pê xweş î

2. 'Eks

'Eks di ferhengê de tê wateya qulibandin û berevajîkirinê. Di belaxetê de eger komek peyvên ku hatine bikaranîn, piştî ji paş ve bi awayekî serûbinkirî bîn bikaranîn, hunera 'eksê derdikeve holê. Ferqa 'eksê ji qelbê ew e ku tiştê ku ji dawiyê tê xwendin di qelbê de herf in, di 'eksê de peyv in (Teftazanî 1960, r. 394; Bilgegil, 1989, r. 331; Saraç 2016, r. 267).

Li jêrê ji bo hunera 'eksê di helbestên Melayê Cizîrî de, çend nimûne cih digirin:

-

Rast û çep tên ceger û sîne kulab
'Er'erên şengi di mest in **çep û rast**

-

Gote me durdane yî **em ji te û tu ji me** yî
Lew bi heqîqet yek in mes'ele bê şubhe ma

-

Pur di pê weslê me **se'y û cehde** da
Cehde û se'ya me hatin der 'ebes

3. Tekrîr

Tekrîr tê wateya tekrar û lêvegerê. Wek têgeheke belaxetê eger di nav metnekî edebî de peyv, yan komepeyvek çendîn caran li pey hev û bi piranî b awayekî sîmetrîk bê dubarekirin ew hunera tekrîrê ye. Di hunera tekrîrê de wate tê bihêzkerin, li ser wê wateyê bal tê kişandin û bi vî awayî heyecanek tê bidestxistin. Ji bo ku dubarekirin asteke edebî bi dest bixe, divê van taybetiyan bicivîne. Eger bêyî van taybetiyan tiştêk bê dubarekirin ew ji rewanbêjîyê dûr dikeve û nakeve kategoriya hunera tekrîrê. Ji ber ku di musemmetên mutekerrir de misrayên dawî yên hemû bendan tînan dubarekirin, ew jî dikevin kategoriya hunera tekrîrê. Di tercî' bendan de jî beytên dubareyê yên nav bendan dibin tekrîr (Bilgegil 1989, r. 252-256; Saraç 2016, r. 196).

Li jêrê ji bo hunera tekrîrê di helbestên Melayê Cizîrî de, çend nimûne cih digirin:

-

Te'alellah zehî husna mubarek
Tebarek sed tebarek sed tebarek

-

Dil girt û da ber xenceran kuştim nigar û dilberan
Me j' destê zulma esmeran **dad û meded dad û meded**

Di van her du mînanan de peyvên “tebarek”, “sed tebarek” û “dad û meded” bi awayekî sîmetrîk hatine dubarekirin.

•
Tu binê sazê bi awazi çî rengî me dixwazit
Ellah Ellah bi Xudê qet dibihê ev çî xîtab e

Te dizanim te dibînim ku tu wî nûrê wucûd
Ellah Ellah ji çî nûr e di seraya me lebaleb

Ellah Ellah ku di ‘umrê xwe tu carek nebihê
Çî seda têtê ji vê gunbedê dewwarê hudûs

Te bi firyad û fixanan bi xwe bulbul kerr kir
Ellah Ellah ji çî derdî we dikalî şeb û roz

Ellah Ellah çerx û dolabê dinê
Nuqte qet nakit di dewranê xelet

Bê tu ya lebşeker î ya tu nebata bi ter î
Ellah Ellah çî tecella ye ji sirra qederî

Ellah Ellah ji çî reng insan î
Yûsufê lebşekerê ‘Ebran î

Çawa xuya dibe Mela ji tekrîra peyva Ellahê gelekî hez kiriye û di dîwanê de di heft cihan de bi kar aniye:

•
Te divê berq û birûskan bireşînî tu nezer de
Te divê roji xuya bit ji şîbakê tu xuya be

Te divê zêr û zeber kî me du zulfan bide ber ba
Te divê qenci qiyamet li me rabit bi xwe rabe

Mela di van her du beytan de li pey hev misra bi peyvên “te divê” daye destpêkirin ku ev şeweya tekrîrê çêjeke taybet dide mûsîqîya helbestê (Bilgegil 1989, r. 252; Macit, 2016, r. 40):

4. Alîterasyon û Asonans

Alîterasyon û asonans du têgehên retorîka Rojavayî ne ku li gor vê disîplînê her du jî ji bo dubarekirina herfan tîbî bikaranîn. Ferqa di nabera wan de ew e ku “alîterasyon” tê wateya dubarekirina herfên bêdeng, asonans jî tê wateya dubarekirina herfên dengdêr (Macit 2016, r.73). Bêguman dubarekirina herfan di heman demê de dubarekirina dengên ku ji herfan derdikevin jî îfade dike. Di belaxeta Rojhilatê de jî têgehên bi dubarekirina dengên herfan re tîkildar hene. Bo nimûne di serwa, paşserwa, tesmît, tekrîr û hwd. de ku di vê gotarê de jî em li ser rawestiyên, dubarekirina herfan heye. Di vê çarçoveyê de dema em li van her du têgehên binêrin em dikarin bibibêjin ku cihê ku serwa û paşserwa lê heye, li wir alîterasyon û asonans jî heye. Lêbelê carinan em derveyê van jî rastî dubarekirina herfan tîbî. Di belaxeta Rojhilatê de ji bo vê yekê tîgeheke taybet nehatiye bikaranîn. Ji ber ku alîterasyon û asonans ji bo hemû herfên dubarekirî tîbî bikaranîn, ew tam li vir dikevin dewrê û ji bo wê tiştê ku di belaxeta Rojhilatê de nav lê nehatiye danîn, ev her du têgehên Rojavayî tîbî bikaranîn. Bêguman ev rewş hunerên alîterasyon û asonansê watedartir dike. Li jêrê jî bo hunera alîterasyon û asonansê di helbestên Melayê Cizîrî de, çend nimûne cih digirin:

•

Canê Melê j'qalû belê bend im welê der kagulê
Belgên gulê rûheykelê ew misk e lê carek hilê

Di vê beytê de di herfa “l”yê de alîterasyon û di herfên “e” û “ê” de jî asonans heye.

•

Yar hat û mest subha elest min dest bi dest dî cam di dest
Kagul dibest tayek verest vê ra şikest nîşan e qest

Di vê beytê de di herfên “s” û “t”yê de alîterasyon û di herfên “a” û “e”yê de jî asonans heye.

•

Ber dilber û leb ber leb û endami lêk
Xewna me bi yarê bidinê te'birê

Di misraya yekem a ê vê beytê de di herfên “b”, “Leyla û Mecnûn” û “r” yê de alîterasyon heye.

•

Di lebsê tarî û nûrê perîrengê sifethûrê
Ji wadê Eymena Tûrê muqeddes kir li min 'erde

Di vê beytê de di herfa “r”yê de alîterasyon heye.

- Ji Hafiz qutbê Şîrazê Mela fehî er bikî razê
Bi awazê ney û sazê bibî ber çerxê perwazê

Di vê beytê de di herfa “z”yê de alîterasyon û di herfa “ê”yê de jî asonans heye.

- Her hey’et û her cismekî her ferd û new’ û qismekî
Rûh wî di destê ismekî mayî di qebze’w pence da

Di vê beytê de di herfa “e”yê de asonans û di herfên “h” û “r”yê de jî alîterasyon heye.

6. Lasayîkirina Dengan

Ji bilî ahenga ku ji yeksaniya dengên herf û peyvên tê bidestxistin ku mînakên heta bi vê derê di vê çarçoveyê de bûn, lasayîkirin/teqlîda dengên siruştî bixwe jî heye. Carinan armanc ji vê yekê derxistina dengêkî ye, carinan jî sazîkirina ahengekê ye di navbera deng û mijarê de. Di vî hunerî de mûsîqîya gerdûnê ya serdema helbestvan tê bidestxistin (Wellek, r. 183). Melayê Cizîrî hindik jî be serî li vê şêwazê daye.

Li jêrê ji bo hunera lasayîkirina dengan di helbestên Melayê Cizîrî de, du nimûne cih digirin:

- Nesîmê sunbul û sêvan seher da hebs û zindanê
Vebû qufîla me bê mîfte **zirîngîni** ji quflê da

Di vê beytê de Mela dengê ku di bêdengiya seherê de ji vebûna qufîla deriyê zindanê derdikeve lasayî kiriye ku ew jî zirîngîni ye.

- **Hay û hûya** subbûhiyan reqs û semaya qudsiyan
Teşbîhê cewqa sofîyan feryad û zîkr û lîrîze da

Di vê beytê de jî Mela dengê ku ji zîkr, reqs û semayê derdikeve bi “hay û hûy”ê lasayî kiriye.

ENCAM

Helbest, di edebiyatê de wek cureya herî edebî tê qebûlîkirin û ji aliyê huner, estetîk û mûsîqîya xwe ve di asteke bilind de tê hûnandin. Tema û naveroka helbestê çibe ferq nake, eger helbestek ji van aliyan ve serkeftî be, ew helbest tu carî kevin nabe. Di helbesta Kurdî de Melayê Cizîrî ji bo vê diyardeyê wek nimûneyeke girîng derdikeve pêş. Mela di tarîxa edebiyata Kurdî de yekem kes

e ku kêşa erûzê bi hemû regezên xwe û bi awayekî serkeftî bi kar aniyê. Berî wî helbesta Kurdî ya ku bi Kurdiya Goranî/Hewramî hatibû nivîsîn, bi kêşa xwemalî/birgeyî bû ku li ser du aliyên pênc birgeyî (5+5) dihat dabeşkirin. Mela di *Dîwana* xwe de di 118 helbestan de heft behrên erûzê bi kar anîne ku ew jî remel, hezec, recez, serî, muzari, besît û xeff in. Hemû behrên ku Mela bi kar anîne, pey wî re di helbesta Kurdî de hatine bikaranîn. Ev jî nîşan dide ku piştî Mela sîstema ku wî di kêşa erûzê de daniye hatiye şopandin. Helbestvanên Tirk di kêşa erûzê de bi piranî helbestvanên Îranî şopandine, lêbelê Mela heta bi astekê di kêşê de şêwazeke xweser bi dest xistiye. Mela di çibicîkirina erûzê de serkeftî ye û di Kurmanciya sade ya rojane de jî erûz bêqusûr tetbîq kiriye. Behrên remel, hezec û recezê piraniya helbestên wî saz dikin ku kojima wan dike % 93.

Serwa û paşserwa jî du hêmanên girîng ên ahengê ne di helbestên Mela de. Ji 118 helbestên Mela di 65 heban de tenê serwa, di 53 heban de jî digel serwayê paşserwa hatiye bikaranîn. Paşserwayên wî yên ku dikevin kategoriya şêwaza Sebke Hindî balê dikişînin. Mela wek şêwazekê “recez” ji bo serwaya hundurîn (hunera tesmîtê) terxan kiriye. Serwaya hundurîn yek ji taybetiyên xweser ên şêwaza Melayê Cizîrî ye. Wî 31 helbestên xwe bi vê şêwazê nivîsîne. Mela di van helbestan de bi şeş şêweyan serwaya hundurîn bi kar aniyê ku ew wek şêwazeke ciyaker a aheng û mûsîqiya Mela derdikeve pêş.

Melayê Cizîrî ji bilî ahenga ku ji kêş, serwa, serwaya hundurîn, paşserwa û neqeratan tê bidestxistin, ji hin hunerên bedîî yên wek î’ade, ‘eks, tekrîr, alîterasyon û asonansê jî ahengeke cuda bi dest xistiye. Herweha lasayîkirina dengên jî taybetiyeke mûsîqiya Melayê Cizîrî ye.

Tiştê girîng ev e ku ew hêmanên ahengê û şêwazên curbicur ên mûsîqiyê, di edebiyata Kurdî de cara pêşî ji aliyê Mela ve bi şêweya kombînasyonê hunerî bi hev re hatine bikaranîn. Ev regez û şêwazên hunerî bi destê Mela ketine nav edebiyata Kurdî ya klasîk. Modelên Mela yên wek Hafîz, Se’dî û Camî di edebiyata Farisî de hene, lêbelê di vê xebatê de aşkera dibe ku Mela, di huner û estetîka xwe de ji wan ne kêmtir e û hin şêwazên orjînal dahênane ku li cem wan nayên dîtin.

Guman tune ye ku Melayê Cizîrî bi vê şêwaza xwe bandorek li pey xwe hiştiye. Gelek helbestvanên Kurd di helbestên xwe de di bin bandora wî de mane û di hunera xwe de ew wek model wergirtine. Ji ber vê jî pêwendiyên Mela û şopgerên wî, pêwîste di çarçoveya rêbazên edebiyata berawirdî, navbermetnî û şêwaznasîyê de bînin tesbîtkirin.

JÊDER

- ‘Ebdûn, ‘E. (2001). *el-Mûsîqî eş-Şafiye li’l-Buhûr es-Safiye*, Qahire: el-Erebî li’n-Neşr.
 Adak, A. (2013). *Destpêka Edebiyata Kurdî ya Klasîk*, Stenbol: Nûbihar.
 Aytaç, G. (2016). *Genel Edebiyat Bilimi*, İstanbul: Doğubatı.

- Ayvazoğlu, B. (2000). “İlmü’l-Cemal”, *DIA*, berg: 22, r: 146-148.
- Cizîrî, M. (2010). *Dîwan*, amd: Selman Dilovan, Stenbol: Nûbihar.
- Ebdula, H. X. (2011). *Berawirdiyeke Kêşnasî di Navbera Erûza Kurdî û Farisî-Dîwanên Melayê Cizîrî û Hafizê Şîrazî Wek Nimûne*, Dihok: Spîrêz.
- Eliot, T. S. (2007). *Edebiyat Üzerine Düşünceler*, (wer. Sevim Kantarcıoğlu), İstanbul: Paradigma.
- Fesaî, M. R. (1373). *Enwa’ê Şîrê Farisî*, Şîraz.
- Gerdî, E. (1999). *Serwa*, Hewlêr: Aras.
- el-Haşimî, S. E. (1997). *Mîzanu’z-Zeheb fî Sin’et Şî’r el-‘Ereb*, Qahîre: Mektebet el-Adab.
- el-Haşimî, S. E. (2012). *Cewahiru’l-Belaxe*, Beyrût: Muessese el-Kutub es-Seqafiyye.
- Haşimî, M. H. (1390). *Rewzene Mecmû’eî Amûzişî Şî’r*, Meşhed: Spîdebaweran.
- Herdî, E. (2004). *el-‘Erûz fî’ş-Şî’ri’l-Kurdî*, Erbîl: el-Mecme’u’l-‘İlmî el-Kurdistanî.
- İpekten, H. (2002). *Nazım Şekilleri ve Arûz*, İst: Dergâh.
- Bilgegil, M. K. (1989). *Edebiyat Bilgi ve Teorileri*, İstanbul: Enderun Yay.
- Levend, A. S. (1984). *Divan Edebiyatı Kelimeler ve Remizler Mazmunlar ve Mefhumlar*, İstanbul: Enderun.
- Macit, M. (2016). *Divan Şiirinde Ahenk Unsurları*, İstanbul: Kapı.
- Mevlevî, T. (1994). *Edebiyat Lügatı*, İstanbul: Enderun Yay.
- Pala, İ. (2003). *Ansiklopedik Divan Şiiri Sözlüğü*, İstanbul: L&M Leyla û Mecnûn Yay.
- Reşîd, M.C. (2017). *Kêş û Serwa di Hozana Kurdî de*, Duhok: Dezgey Nalbend.
- Saraç, M. Y. (2016). *Klasik Edebiyat Bilgisi Belagat*, İstanbul: Gökkubbe.
- Şemîsa, S. (1378). *Kulliyatî Sebķşinasî*, Tehran: İntîşaratî Firdews.
- Teftazanî, S. (1960). *Muxteseru’l-Me’anî*, İstanbul: Bahar Matbaası.
- Tebriîzî, X. (2014). *Kitabu’l-Kafî fî’l-‘Erûz we’l-Qewafî*, Beyrût: el-Mektebe el-‘Esriyye.
- Wellek, R. & Warren, A. (1948). *Theoryn of Literature*, New York: Harcourt, Brace and Company.
- Xeznedar, M. (2002). *Mêjûy Edebî Kurdî*, (berg 2), Hewlêr: Dezgay Aras.
- Yetiş K. (1988). “Âhenk”, *DIA*, (berg: 1, r: 516-517), İstanbul: DIA.
- Zerqanî, S. M. (1345). *Bûtîqayî Klasîk*, Tehran: İntîşaratî Soxen.